



ATASSUT INATSISARTUNI

ATASSUT

UPA2015/135

Steen Lynge

13.05.2015.

Naalakkersuisut Inatsisartullu qanoq ICC-p 2014-imí ataatsimeersuarnerani inaarutaasumik nalunaarusiaani Kitigaaryunnit Nalunaarummi anguniagassatut allattorsimasut anguneqarsinnaanissaannut qanoq suleqataasinnaanersut kiisalu issittumi inatsisartut naalakkersuisullu allat suleqatigalugit issittumilu annerusumik suleqatigilernissaq pillugu oqallissiatut siunnersuut.

(Inatsisartunut ilaasortat Sara Olsvig og Mimi Karlsen, Inuit Ataqatigiit)

Inuit Issittormiut Siunnersuisoqatigiiffiata ataatsimeersuarnerani, Inuvimmi Canadami ulluni 20.-24. juli 2014 pisumi Kitigaaryunnit Nalunaarut ukiuni tulliuttuni sisamani anguniagassanik imalik akuerineqartoq aallaavigalugu anguniagassatut isumaqatigiissutaasunut Kalaallit Nunatsinni pisortat qanoq tapertaasinnaanersut matumani Inatsisartunut ilaasortat Sara Olsvig og Mimi Karlsen, Inuit Ataqatigiit apeqquteqaat aallaavigalugu oqallississami matumani ujartuipput.

Issittumi suleqatigiinnerup annerpaatinneqarnissaa nunanullu peqataasunut iluaquutanerpaatinneqarnissaa ATASSUT-mit pingaartipparput, taamaammallu pisortatigoortumik aammalu tamatuma saniatigut pisortatigoortuunngitsumik suleqatigiinnerit pitsasumik inerisitaqarfiusassasut soorunami soqutigalugulu pingaartitaraarput.

Siunnersuuteqartut suliniutissatut isumaqatigiissutaasut tigussaasut arlalissuit soqutiginartullu matumani assersuutitut tikkuartorpaat, ATASSUT-mit isumaqatigiissutigineqartoq immikkualuttunngorlugu pulaterfiginngikkaluarlutigu tunngaviusumik tapersiinerput matumuuna apuutissavarput, taamaattorli aamma pisortat avataatigut suleqatigiinneq pisortat tungaannit aamma ataqqineqartariaqartoq tassami sulineq siunertallu matumani pineqartut tassaapput suliniaqatigiiffit pisortanut pituttorsimanngitsut siunniussaat.

Taamatulli oqareerluta ATASSUT-mit ilanngullugu oqaatigissavarput, nassuerutigalugu issittormiut qilerutaat, suleqatigiinnerat aammalu issittumi inuuusugut tunngaviusumik illersugaanerput



ATASSUT INATSISARTUNI

pitsaanerpaamik qukakkeersimaneqassappat suliniaqatigiiffit pisortanut pituttorsimanngitsut sulinerat issittumi pisortat pinngitsoorsinnaanngikkaat, taamaammallu ingerlalluarnissaannik qulakkeerinneqataanissaq pisariaqarmat ATASSUT-mit piareersimagatta issittormiut suliniaqatigiiffii pisortanut pituttorsimanngitsut ataatsimoorlutik suliniaqatigiiffiannut ICC-mut Kalaallit Nunatta ersarissumik tapersersuinissaa aningaasanut inatsit aqqutigalugu qulakkeersimaneqarnera nukittorsassallugu.

Taakkugallarput ATASSUT-mit oqallisssiamut tapersiissutigumasagut.